

Na osnovu člana 64. stav 5. Zakona o vodama („Službene novine Federacije BiH“, broj 70/06), federalni ministar poljoprivrede, vodoprivrede i šumarstva d o n o s i

**PRAVILNIK
O IZMJENAMA I DOPUNAMA PRAVILNIKA O USLOVIMA KOJE MORAJU
ISPUNJAVATI REFERENTNE ODNOSNO OVLAŠTENE LABORATORIJE ZA
ISPITIVANJE VODA, SADRŽAJ I NAČIN DAVANJA OVLAŠTI**

Član 1.

U Pravilniku o uslovima koje moraju ispunjavati referentne, odnosno ovlaštene laboratorije za ispitivanje voda, sadržaju i načinu davanja ovlasti („Službene novine Federacije BiH“, br. 14/10., 14/13 i 26/14), u članu 4. u stavu 1. riječi: „zahtjeve za izvršavanje pojedinih grupa poslova navedenih u članu 5. ovog pravilnika“ zamjenjuju se riječima: „uslove propisane odredbama ovog pravilnika za poslove koji se podugovaraju.“

Član 2.

U članu 31. u stavu 2. tačka 6. briše se, dosadašnja tačka 7. postaje tačka 6.

Član 3

U članu 36. u stavu 1. tačka 2. mijenja se i glasi:

„2. ako izgubi akreditaciju za određenu vrstu ispitivanja.“

Član 4

U članu 37. u stavu 1. riječi „sedam (7) godina“ zamjenjuju se riječima: „deset (10) godina“.

Iza stava (1) dodaje se novi stav (2) koji glasi:

„(2) Ovlaštene laboratorije za ispitivanje otpadnih voda dužne su u roku od jedne (1) godine od dana stupanja na snagu ovoga pravilnika pribaviti akreditaciju iz člana 4. stav 2. ovoga pravilnika prema BAS EN ISO/IEC 17025 standardu za slijedeća ispitivanja otpadnih voda: mjerodavni proticaj, temperatura, pH, miris-boja, sadržaj otopljenog kisika, BPK5, HPK, suspendirane materije, taložive tvari, električna provodljivost, ukupne suspendirane materije, NH₄-N, ukupni azot i ukupni fosfor i test toksičnosti (bioogled sa *Daphnia magna Straus*).

Član 5

U članu 39. riječi: „tač. 6. i 7.“ mijenjaju se i glase: „tačke 6.“

Član 6.

Ovaj Pravilnik stupa na snagu narednog dana od dana objavljivanja u „Službenim novinama Federacije BiH“.

Broj:
Sarajevo, 2017. godine

MINISTAR
mr.sci. Šemsudin Dedić

OBRAZLOŽENJE
PRAVILNIKA O IZMJENI PRAVILNIKA O USLOVIMA KOJE MORAJU
ISPUNJAVATI REFERENTNE ODNOSNO OVLAŠTENE LABORATORIJE ZA
ISPITIVANJE VODA, SADRŽAJ I NAČIN DAVANJA OVLAŠTI

1. PRAVNI OSNOV

Pravni osnov za donošenje Pravilnika o izmjenama Pravilnika o uslovima koje moraju ispunjavati referentne odnosno ovlaštene laboratorije za ispitivanja voda, sadržaju i načinu davanja ovlaštenja (u daljem tekstu: Pravilnik) sadržan je u članu 64. stav 5. Zakona o vodama (Službene novine Federacije BiH", broj 70/06) prema kojem je federalni ministar poljoprivrede, vodoprivrede i šumarstva ovlašten da utvrdi uslove koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlaštenja.

2. RAZLOZI ZA DONOŠENJE PRAVILNIKA

U Federaciji BiH četrnaest laboratorija je ovlašteno od Ministarstva poljoprivrede, vodoprivrede i šumarstva za ispitivanje voda, sa rokom do 22.3.2017.godine za pribavljanje akreditacije po BAS ISO 17025 standardu za sve analitičke poslove koje obavljaju.

Većina ovlaštenih laboratorija je započela proces akreditacije, ali obzirom da je to zahtjevan i dugotrajan proces koji zahtijeva velika finansijska ulaganja, te odgovarajuća stručna znanja, još nijedna ovlaštena laboratorija nije pribavila akreditaciju za sve parametre i metode ispitivanja voda.

Nakon provedene analize i istraživanja, FMPVŠ je zaključilo da se trenutno samo jedna laboratorija u Federaciji Bosne i Hercegovine akreditovala po BAS ISO 17025 standardu za petnaest (15) osnovnih parametara ispitivanja otpadnih voda navedenih u članu 2. ovog Pravilnika, koji su propisani odredbom člana 11. stav 6. Uredbe o uslovima ispuštanja otpadnih voda u okoliš i sistem javne kanalizacije („Službene novine Federacije BiH“, br. 101/15 i 1/16), a da se očekuje da će većina laboratorija u roku od godinu dana od dana stupanja na snagu ovog pravilnika to postići, dok se pribavljanje akreditacija za sve ostale parametre ispitivanja voda očekuje u periodu od tri godine od dana stupanja na snagu ovog pravilnika.

Obzirom da su međulaboratorijska poredbena ispitivanja sastavni dio pribavljanja akreditacije, iz tog razloga je bilo neophodno promijeniti odredbe čl. 31., 36. i 39. Pravilnika.

Izmjenama ovog pravilnika postići će se konkurentnost na tržištu, davanje ovlaštenja laboratoriji za obavljanje kontrolnih ispitivanja, kao i kontinuitet obavljanja ispitivanja otpadnih voda ogromnog broja zagađivača u Federaciji BiH.

S tim u vezi, donošenjem ovog Pravilnika produžit će se vremenski rok za pribavljanje akreditacije, a samim tim stvorit će se potrebni preduslovi za akreditaciju ovlaštenih laboratorija u skladu sa BAS ISO 17025 standardom.

3. OBRAZLOŽENJE POJEDINIH ODREDBI

Članom 1. predloženog Pravilnika o izmjenama Pravilnika o uslovima koje moraju ispunjavati referentne, odnosno ovlaštene laboratorije za ispitivanje voda, sadržaju i načinu davanja ovlasti predloženo je da se član 4. izmijeni u smislu da se sklapanje ugovora ovlaštene laboratorije za ispitivanje voda sa drugim osposobljenim ovlaštenim podugovaračima odnosi ne samo na odredbu navedenu u članu 5. ovog pravilnika nego na sve uslove propisane odredbama ovog pravilnika za poslove koji se podugovaraju.

Članom 2. predloženo je da se u članu 31. u stavu 2. tačka 6. briše iz razloga što su međulaboratorijska poredbena ispitivanja sastavni dio pribavljanja akreditacije, odnosno kad se pribavi akreditacija to znači da su obavljena i međulaboratorijska poredbena ispitivanja.

Članom 3. predloženo je da se u članu 36. stavu 1. tačka 2. mijenja iz razloga što su međulaboratorijska poredbena ispitivanja sastavni dio pribavljanja akreditacije.

Članom 4. predloženo je produženje vremenskog roka za pribavljanje akreditacije kako za osnovne parametre ispitivanja otpadnih voda tako i za sve ostale parametre ispitivanja voda.

Članom 5. mijenja se član 39. zbog usaglašavanja sa predloženom odredbom člana 2. Pravilnika.

Članom 6. definisan je rok stupanja na snagu predloženih izmjena.

4. PROCES JAVNIH KONSULTACIJA

Obzirom da predložene odredbe Pravilnika ne sadrže suštinske promjene, nego se samo produžuje vremenski rok za pribavljanje akreditacije, a samim tim stvorit će se potrebni preduslovi za akreditaciju ovlaštenih laboratorija u skladu sa BAS ISO 17025 standardom, nema potrebe za provođenjem javnih konsultacija.

5. PROCJENA EKONOMSKE OPRAVDANOSTI DONOŠENJA PROPISA, OBRAZLOŽENJE FINANSIJSKIH SREDSTAVA ZA PROVOĐENJE PROPISA I FINANSIJSKE EFEKTE

Za realizaciju ovog Pravilnika nije potrebno izdvajanje finansijskih sredstava iz Budžeta Federacije BiH. U prilogu je dat i odgovarajući obrazac u skladu sa

odredbama Pravilnika o proceduri za izradu Izjave o fiskalnoj procjeni zakona, drugih propisa i akata planiranja na budžet.

6. OCJENA USKLAĐENOSTI SA EU ZAKONODAVSTVOM

Obzirom da se ovim Pravilnikom samo produžuje vremenski rok za pribavljanje akreditacije, nema potrebe za izradu Usporednog prikaza i Izjave o usklađenosti.